

TIMOT WÛR **Hapu Na Pawrô Jõ Kàhhôc**

Ûhÿ, pê Pawrô pê Jeju jarkwa na memprar catêjê nõ Timot mã, pom cu me hõ kàhhôc pijakrut cahyt itajê kujate. Na pê hapu na hõ kàhhôc ita japry pê **Timot WÛr, Hapu Na Pawrô Jõ Kàhhôc** (2 Timot).

Ne Timot pê intuw, ne ajco Pawrô kôt apu ipa. Jirô pê mã pêPawrô Epet jõ krĩ kam Jeju na mehkwy mehkrĩ atajê to ihhimpej catê na Timot xãm. Ne Pawrô Roman jõ krĩ kam me hacjên xà kam ihkrĩ, ne ramãcute mehcuran na hàhtêp na, cumã amji jahkre pej. Ne pom cu hapu na me hõ kàhhôc cahyt ita kam, pê PawrôTimot mã cute Pahpãm cwÿrjapê mehcuranxà ata cupa nare na, amji jarẽ. Ne hanea ne cute cumã, jũ caxuw jũmjê te me cupê Jeju na mehkwy na cumã amji jarẽ, ne ajteare mã cute me amji kam hapac xà atajê cawpa.

Pê Pawrô Timot mã amji jarẽ

¹⁻² Ikra Timot, ipê Pawrô, wa ha hipêr amã ihhôc. Ca ikôt Jeju kôt apa ita kam, wa ato amji kra, ne imã akĩnti. Pê Pahpãm JejuCrixto mã iprar catê na ito. Na wa ipê cumã iprar catê. Ne pê imã harkwa ta, na wa pjê cunea kam, mehcunea mã icakôc ne me cumã awjarẽ. He cu ha Jeju na meamji hõnco tu, quê ha me pamã pahte amji kam me pajapac xà tuw pejti atajê gõ. Imã Pahpãm pême pajõ Inxũ me, me pajõ

Pahhiti pê Jeju Crixôtôe me ato impejti na, me ato prãm. Ne cute me acaprĩ na, imã me ato prãm, ne amãacaxwãm pê, cute acaxwÿn kam acarĩcti impejti jôr to ipa na, me ato prãm.

*Pê Pawrô amji caxuw Timot japackre
Me Hàpên Xà 16.1-2*

³ Wa Pahpãm mã apu ijàpên to ipa, ne cute ampo cunea na ito ihhimpej atajê cunea wa ton to ipa, me quêtjê cuxà, ne nee amji pêihhimpej xà nõ to ijapac kêt, ne ihcaca nare. Ne wa hãn ne amcro me, caxwa kam Pahpãm mã icakôc, ne nee amji pê ato ijapac kêt nare Timot, ne itÿj cumã acajrën, ne cumã apyrên ijakryti na amji jarën to ipa.

⁴ Ne me papicapôn xà ata kam, wa cormã acwÿr ata na ato amji japackre. Na wa hipêr apupun prãm, ite apyrên amji jakryti prãmte.

⁵ Na wa itÿj ate Jeju to amji mã ahimpej to apa na, ato amji japackre to ipa to hanea, pom quê atocatyjre pê Rojtiqwÿj, me anã pê Ewnixêkwÿj Jeju to amji mãmehhimpej he.

⁶ Na pê wa akrã na ijũ xi, ne acajrën ne apê Pahpãm mã gápên catê na, cumã agõ. Pê Pahpãm amã Carõ Pejti carôt gõ, ate nee amji mã ampo cupa nare xà na. Ne akam carôt ita to amji japackrea ne.

⁷ Quê ha Pahpãm me pamã Carõ Pejti gõ, cu ha nee ame amji mã pahto me papa nare. Ne quêt ampocrê itajê na quê ha me pahtehcajpa he. Quêha carôat kôt ame papa na, me pahtehcajpa. Ne me pahcunea te ajpên kĩnti na, me pahtehcajpa, ne hanea ne pahte me ampo kên to

amji kam pajapac tête, me amji jiprõn na, me pahtehcajpa.

Pê Pawrô mã Timot te ihkôat amji ton na to prãm

1 Timot 4.6-16; Tito 2.1-8

⁸ Cwýrjapê ca ha nee me cumã me pajõ Pahhiti to gũjarên na apahàm nare. Ne hanea ne, nee Jeju cwýrjapê cute me ijaxâr ita na, apu ikamapahàm nare. Ne quêt icahê na gũjarên pejti xà itajê na, ca amji pupun xà kêanre to apa. He ramã me Pahpãm te ita caxuw amã carôt jõr.

⁹ Ne pê me pahkên pê me pahto hapôj, ne me pahto amji kwýa. Xà pê cu ajkĩ me ampo pejti to na mã, pê me pahto hane? Hãpà. Pê cute amji kam hapac xà to hajýr prãmte, pê me pahto impejti ita to hane. Ne pê mam, rý pêa mã, Pahpãm pjê ton xwýjrea na amji jarên to:

— Wa ha me kritxwý na me cumã ikra Jeju kujate, quê hamehtyc jahpan xà na ty. Wa hahõmpu ne ihkôt me to impejti ne, quê ha nee jũ caxuw ihkên cati mã mencjêj nare — hane.

¹⁰ Ne pê amji jarên xà ata na, me pamã me pahtyc jahpan xà na, Jeju tyc xà wýr ihkujate. Pê ty, ne hacpýa mã ihtír. Cwýrjapê quê ha Jeju to amji mãmehhimpej to me ipa atajê me ty, ne me cupê hũràac, ne hacpýa mã mehtír rohnýtti mã. Hõhõ, me pajũjarên xà impejti itajêa, cu ha me cumã harên to me papa.

¹¹ Ne Pahpãm pê icapi, ite ijũjarên xà impejti itajê jarên, ne Jeju na mehkwy mã to hahkre prãmte, pê icapi ne ikujate.

¹² Cwÿrjapê wa ampo itajêa na amji pupun xà kêanre to amji pupu. Ne nee apu ipahàm nare, ne nee apu amji mã pa nare. Ampo na? Pahpãm pêmã ijâpên xà ita gõ, ne cute imã ijamâr xà caxuw carôt tÿjti jôr. Ne quê ha hàpên xà ita ijamâr itaa na, quê ha ahnaahacpÿ ne Jeju amji jaxà, hõ amcro ata na.

¹³ Ne pom ampeaj kam ite amã ampo to hahkre itajê, ca ha amji mã hahkre pej, ne mecumã to hahkre to apa. Ne ihkôat amji ton to apa xà caxuw, wa ite amã to hahkre partu, he ampeaj kam ri quêt ite amã ampo to hahkre xà toihimpej atajê. Ne Jeju to caha amji mã me ahimpej na amji to ihtÿaj to apa kamto acrà tu ne. Ne ca ha hanea ne Jeju na mehkwy kwÿ me, kam ajpên kînti to me ahônco tu ne.

¹⁴ Ca ha atÿj amjimã me ite amã ampo pejti to hahkre xà itajê cunea nôrto me apa na, quê ha acaxwãm pê Pahpãm Carõ Pejti ate ton xà ata na atehcajpa.

Pê Pawrô Timot mã Onetipo pejti na harê

2 Timot 4.16-18

¹⁵ Ne ramã ate Axij jõ pjê kam mehcunea te me ijicu, ne ma ame icaca name ijahkre pej, mã hanea ne Pijer me Hermojên te ijicu.

¹⁶ Imã Pahpãm te Onetipome, mehkra to impejti na me to prãm, ne cute me caprîna imã me to prãm. Ampo na? Ramã cute imã ijakry catia jôr, ne nee cute me ijaxàr ita jũ na amehpahàm nare.

¹⁷ Ne Roman jõ krî mã cator, pê ma apu ijapên to mõi, ne ina cator.

18 Ne amã Epet jõ krĩ kam cute itehcajpar catia na hahkre pej. Ne imã Pahpãm te, Jeju to amji jaxàr xà kam, cute Onetipo caprĩ na to prãm.

2

Quê ha Timot pê Jeju cahê na ipijapu catê impejti

1 Timot 6.11-16

¹ ÿhỹ ikra, ca ha Jeju carôt to amji to ihtỳj.

² Ne pom me hàhtôa kam mare mã ite amã icakôc xà to hahkre itajê, ca ha hanea ne jũmjê mã to hahkre. Ne por jũmjê atajê quê ha catytkam me ipa, ne me hũpar pejti to me ipa na, quê ha ihtỳj ma amũ irô mã, jũmjê mã ampoitajêa to hahkre.

³ Me papê Jeju cahê na me papijapu catêjê, cwyrjapê ca ha icuxà ajũcanãar kam apa.

⁴ Ne me ipijapu xà kam krãhtare pê me hàprê catêjê ihtỳj amji caxuw me hõ pahhi kam hapac to me ipa. Cwyrjapêri nee me ipijapu xà te amji kam hapac xàata ràn xà na, ihkwỳ to amji kam hapac nare.

⁵ He me hàhcukren catêjê te hajỹar, quê ha me hacrer catê me hacrer, quê ha ajkaam amentoj, ne jũm te imprar tỳj ne mam cator na, quê ha ihtỳjamcwa. Hõhõ, cu ha me papê me hàhcukren catêjê pyrãac, ne Pahpãm jarkwa kôt, catyt kam mecumã pajàpên to mempejti na, cu ha pahtỳj me amcwa.

⁶ Ne pur kam hàpên catê te me hajỹar, quê ha pur kam apê, quê ha cumã hõ intuw, quê ha

mam quêt hõ intuw ata nõ krẽ, ne Jeju mãme gápên xà itajê pê itajê pyràac.

⁷ Ne ite amã ampo jarên itajê to amji kampa ne ihkõt hakoap ne, quê ha ihtÿj Pahpãm ate impar jahkre pej na atehcajpa, ca ha hahkre pej.

⁸ Ne Jeju pê pahhiTawi xwÿ tàm xwÿ, ne hacpÿa mã ihtĩr na, harên xàimpejti itajê to wa mehcunea mã ijũjarên to ipa.

⁹ Cwÿrjapê ri ihhêj rũm ipê mehkên catêjê pyràac, mã wakÿti te ijara juwapre. Ne Pahpãm jarkwa nare, jũ wÿr quê jũm ihcajpre.

¹⁰ Na wa itÿj Pahpãm na mehkÿwÿ mã, ite amji pupun xà kèanre itajê mã ijũcanãr to ipa. Hõ, wa itÿj apu hajÿr to ipa, mãr quê xwÿ mã Pahpãm wÿr me apkjê, quê Jeju mehkên pê me to hapôj pa, mãr quê mempejti na Pahpãm cahê na, cõjkwa kam ame ipa rohnÿtti mã. Hõhõ, pê ramãrÿ pèa mã Pahpãm amji mã me pahto hajÿr to prãm.

¹¹ Ita caxuw wa ha caxwãm catia mã, ite ampo to me amã hahkre xà impejti atajê to me amã hahkre he:

Cu ha amjia kõt me papa jicu me mãa mã, pahtÿj Jeju cwÿrjapê me pahtyc to prãm na, cu ha pahtÿj cahi na ame papa.

¹² Cu ha ame amji pupun xà kèanre ita kam ame pajũcanãr kam me to pancrà na, cu ha pahtÿj cahê na amji to ame pahhi. Nãmri cu ha pahte amehcaca, ne me hicu na, quê ha hanea ne ame pahcaca, ne me pajicu.

¹³ Nãmri cu ha pahte me amji jarkwa par nare na,

quê ha ihtỳj quêt Jeju amji jarkwa pa.
Ampo na? Jũ wỳr quê taa amji mã ihhêj.

*Pê Pawrô Timot mã amji krac ri mehcahôc kên
catêjê cawpa*

1 Petrô 3.15-16

¹⁴ Ne me akwỳa te ampo to hahkre xà impejti itajê to ma me amji japackrea ne ajco, ne ma me to. Ne ahna me to ihtỳaj ne, quê nee ihcaprỳ na mehcahôc xà kryjre incwỳrjapê ame ajpên mãn nare. Nãmri mehkwỳ kam mare mã cute me ajpên mãn ita na ihkaj na, quê ame hane, quê ame kampa, ne hanea ne mehkêanre ne.

¹⁵ Ne me hâpên catê nõ impejti ata, quê ha hâpên xà to impejti to ipa, mãr quê jũm hâpên xà ata pupu, quê nee hâpên xà ita jũ naihpahàm nare. Ne pom ca ramã gâpên xà to apê ita to ca ha apê, ne Pahpãm na mehkwỳ mã ampo to hahkre to impejti to apa. Mãr quê Pahpãm jũ caxuw acukij, ca nee gâpên xà nõ impejti ata jũ na apu apahàm nare.

¹⁶ Ne mehkwỳ pê Pahpãm na mehkwỳ nare atajê ri ajteare mã me amji kampa, ne amjia kôt me harkwa kôt hamreare atajê to ame hahkre to me ipa. Ne Pahpãm ma apu mehcahôc xà kôt hamreare atajê caca. Ampo na? Cute Pahpãm jô pry tête mehkwỳ to pry rên prãmte ri amehcahôc xà itajêto.

¹⁷ Ne me hũmre te me hapackre xà ita pê ihhêj rũm cagã te mehcãmzar, mã kam ihu, ne hĩ cacu, ne ihpỳpỳm to ipa ata pyrâac. Ne me hũmre atajêa rikam Pahpãm te amji kam hapac xà cacrô, mãihtỳj ame to kêanre to me ipa. Atajê

pêri ampo kên to pit mã hahkre catêjê he: Himên me Piret.

¹⁸ Ne ma ame Pahpãm jarkwa cajrer pejti, cuhtacti ata caca, ne cute mehcupan, ne mehkwy mã mehhêj xi xà to:

— Pom Pahpãm te hacpÿa mã me pahto ihtîr na amji ton xà ata te ma ramã me pajakren — hajÿr. Cwÿrjapê ri Jeju na mehkwy jàhtôa ne cute me hũhhyr, mã kyre pê ajpên kam Jeju kôt ame amji ton to me ipa.

¹⁹ Ne quêt Pahpãm na mehkwy te Jeju to amji mã mehhimpej tÿjti itajê pê ihhêj rûm ikre jicjêc tÿjti ata pyrâac. Mã Pahpãm pê ikre ton catê pyrâac, ne cute ikre mã hũxwÿr, mã cumã apu ihcuhhê. Ne jÿwÿr quê jûm hũhta. Ne por pÿ tÿjti ata kam ihhêj ne ihhôt ata jÿjarên xà te hajÿr he: “Pahpãm mã ihtÿj amji kwÿa jahkre pej” ne: “Quê ha mehkwy te Pahpãm na mehkwy na amji jarên na, quê ha ihtÿj mehkên cunea mã hikra, ne me hîcu” hane.

²⁰ Me hakràj catêjê jÿrkwa kam ampeaj kam me cumã me hàwmrô xà me, me hàpàn xà pyxwÿr xà jàhtô. Ne ihkwÿ na kyre pê hÿ ahwÿ, neihkwÿ impejti atajê na ri ampeaj kam hÿ ahwÿ. Ne por impejti atajê ri quêt, cute me to amji mã amcro jirên xà atajêa na kam me apà, itajikjê na ri me papê ampo itajê pyrâac.

²¹ Cu ha me pahte ame pahkên jicu, ne ampo te ame pahtûm atajê jÿrê, ne ame pahtetetti ne, me pajapên xà caxuw. Quê ha ihtÿj Pahpãm me pamã hàpên xà impejti nō gō, cu ha me cumã apê.

22 Ỡhỹ Timot, cormã atuwre cacrô, ca ha nee apê mentuwre te amji kam hapac xà, kôt hakop nare atajê pyrác nare. Nãmri mentuwre itajê quê ha pjê kam me ampo pejti pupu, ne nee ihkôt me hakop nare kam, ma ihkôt mepra. Ne caa, ca ha hajÿr nare, ca ha nee apu ita ton to apa nare, ne quêt catyt kam apa, ne Pahpãm to amji mã ahimpej to apa. Ne nee me akwÿa me ameajpên mãn nare, ne nee ame apijapu nare, ne catyt kam cama ame ajpên kinti to me apa. Ampo na? Nãmri me akwÿ cunea te amji kam hapac xà cunea tetetpit, ne quêt Pahpãm te me atehcajpar na, ca me ahcukij.

23 Ne pom ajpên krac ri me harkwa cacrô to amehcakôc atajê pê, ca amjito guphêa ne. Nãmri ramã ate, cute me hajÿr to mômã mã, ma ame ipijapu na me hahkre pej.

24 Ne Pahpãm mã me pajàpên catêjê itajê nee ame papijapu xà nare. Cu ha quêt cama me amji mã pahprĩa ne me pajàhcaprĩa kam mecumã ampi ne, ampo to me cumã hahkre to me papa.

25-26 Quê ihhêaj to jũm ame pahkam incryc, cu ha me cumã ampi ne me cumã pahcaprĩ, ne hacpÿa mã mehcuhtac. Ne por me pampar nare atajê pê ihhêj rũm, ramã me pahcurê xwÿn pê Xatanaj jô kwÿc mã amencjêj. Mã Xatanaj ita me to ihmimpej, mã harkwakôt amji to mehhimpej to ame ipa. Cu ha me cumã ampi ne me to hahkre to me papa, ne me ahna Pahpãm wÿ, quê ihhêaj to mehtehtajpa, quê ha xwÿ mã hacpÿa mã Pahpãm wÿr me apkjê, ne me amji krã kre, ne Xatanajjô kwÿc ata pê ame hapôj.

3

*Pê Pawrô Timot mã amcro cahhur atajê cawpa
Coroxo 2.16-19; 1 Timot 4.1-5; 2 Petrô 2.1-3;
Juta 3-16*

¹ Ỡhỹ Timot, wa ha ita caxuw amã Jeju te amji jaxâr xà jõ amcro cahhur kôt harê. Ne amcro cahhur ata kam, quê ha ampo cunea apu amji mã hamâr nare.

² Quê ha amcro atajê ihkêanre, ne ampeaj kam hũpa. Ampo na? Quê ha mehcunea amehkêanre, ne amji to pit mã ame amji kam hapac to me ipa, ne me hàhcukrêj me, ihpore to pit mã amji mã me cuprôn to me ipa prãm. Ne mehkwy amji jirôa pê amji to me cati to prãm, ne amji to me hàprâr to me ipa. Ne mehkwyà kwỳ to ihhêj rũm mehkryjre ta, ne ampo cunea na mecumã hũjahkre to me ipa. Ne mehcunea me amji xũn kêanre to ame ipa, ne nee me hũmxwỳimpar nare, ne nee cute me cumã ampo pejti jôr atajê pyrên, me cumã me hakryti na me amji jarên to me ipa nare, ne nee amji mã me Pahpãm cupa nare.

³ Ne nee me cumã mehkwy kĩn nare, ne nee me hàhcaprĩ nare, ne cama mehkwy to ihhêj xi xà to kêanre to me ipa, cute mehkên mã me irên prãmte. Ne amji mã mehkêanre ne, ne me amji mã hamâr nare ne. Ne me cupê ampo pejti to kên catêjê, ne nee me cumã ampo pejti kĩn nare, ne me hàprêa to me hàprê.

⁴ Ne me hõ ikwỳ nõ catêjêa jarên to mehkêanre to me ipa, cute mehkên mã me irên prãmte. Ne hãn ne ampo kên kam mehkrã acto tu, mãnee

kam me amji cajpěr nare, ne mehkên itajê to ihtÿj amji to ame catia to me prãm. Ne cute Pahpãm kaj na amji kam me hapac xàa na amji mã meampo ton to prãm, itajê to pit mã ame ipa.

⁵ Ne mehkwy mã me cupê ihhêj rûm ampeaj kam Pahpãm carôat kôt, catyt kam Jeju kôt meipa catêjê, ne nee mã cama ampeaj kam nare, ne amehhêaj to ame ipa. Ne pom cute me hajÿr catêjê itajê pê, ma amji to guphê to apa.

⁶ Nãmri hãn ne ikre cunea kôt mencjêj to me ipa, ne pyjê mã mehhêj xi xà kêanre atajê to mehhêj to me ipa. Mã hãn ne pyjê itajê te mehahkre pej nõ kam, mehkôat ame ampo kêanre atajê ton to me ipa. Ne ramã me caxwãm pê cute mehkêanre na me amji jahkre pej, na ri amehpeacre.

⁷ Ne pom cute me cumã ampo to hahkre catêjê itajê cuxà, cute ame ampo itajê jahkre pej prãmte, te ampeaj kam me kampa cakrô, ne nee jũm te ihkôthakop, ne kam hapac, ne hahkre pej pej nare.

⁸ Ahnaa mã pê Janaj xwÿ me Jãmprê xwÿ he, ne Mojxe xwÿ cuna mã amji kam me hapac xà tokêanre he. Ita kôpit na mã, me hũmre hêj xi itajê te Pahpãm jarkwa hêj xi nare ata cuna mã me amji kam me hapac xà kêanre to me amji kam hapac he. Nemehkrã kêanre, ne cute Jeju kôt me amji kam hapac jicu.

⁹ Ne pom me hũmre itajê quê ha nee ame ipa ry nare. Ampo na? Quê ha mehcunea, cute me Janaj me Jãmprê cuxà, cute me amji jahkre kêatre ata na me hõmpu.

*Pê Pawrô Pahpãm jarkwa na Timot japackre
Me Hàpên Xà 13.50-14.7*

¹⁰ Ne ca nare, he ca ramã ite amã ampoto hahkre xàa kôt ate amji ton. Neca ramã ite amji kam ijapac xà cunea na ate ipupun, ne ahna ijahkre pej. Ne ramã ate ampo caxuw ipa na ijahkre pej. Nãmriwa ramã Jeju to amji mã ihmpej to ipa, ne ampo cunea na, amji mã me ato ijàhtàtti to ipa, ne amehkĩnti to ipa, ne ijũcanãar kam ampo itajê kam to icrà to ipa. Mã mehkwyte ame ito kêanre prãmte, cama ame icapôr to me ipa.

¹¹ Na wa amji pupun xà kêanre to amji pupun to ipa. Ca ramã ate ijarên par, neahna ipupun xà atajê na amã ijahkre pejtu. Ne ate Antijoc jô krĩ me, Ampokrekà jô krĩ me, Ritij jô krĩkam, por ampo cunea te ito kêanre ata na ateijahkre pej pejtu. Pê ajco Pahpãm pê Pahhiti ampo itajê cunea pê ito hapôj to ipa.

¹² Ne por Jeju kôt me amji ton to me ipa prãm atajê cunea, quê ha icuxà, ampo itajê na me amji pupu.

¹³ Ne me hũmre krã kêanre, mehkwy mã ihhêj to ipa atajê kwya to ri, cute me cumã ihhêj jahpan xà na, mehkwyà kwý te hanea ne me cumã ihhêj.

¹⁴ Ne ca Timot, pom ate ampo to hahkre ne hahkre pej, ne catyt kam ihkôat apa atajê kam, ca ha quêt to acrà tu.

¹⁵ Ne pê ca gôkre nôre naamã, Pahpãm jarkwa to cute me amã hahkre catêjê jahkre pej, atajê cukwa kam ri amã Pahpãm jarkwa jahkre pej. Ne pom Pahpãm jarkwa jô kàhhôc ita, quê

ha ihtÿj ampo cunea na atehcajpa. Ca ha gũparkrã kreti to awpa, ne Jeju Crixto to amji mã ahimpejto apa, ne akên cati pê acato.

Cu ha Pahpãm jarkwa to me pajàpên xà caxuw me pahcũmpej

¹⁶ Ne pê ramã mam Pahpãm na mehkwy, Pahpãm Carõ Pejti jarkwaa kôt, ihkàhhôc ata kam mehhôc. Ne ampo pejti itajê cunea caxuw ri impej he. Ihtÿj ampo pej cunea to me cumã hahkre xà caxuw impej. Ne cute me ampo kên ton, mã intête cute me cumãn xà caxuw impej. Ne me cute amji kam me hapac xà jikutti, mã cute hacpÿa mã mehcuhtac xà caxuw impej. Ne caxwãm catia mã, catyt kam me ipa xà to mecumã hahkre xà caxuw hanea ne impej.

¹⁷ Hõhõ, quê ha jũm mã Pahpãm kôt ipa, ne cumã hàpên catê na cumã amji ton to prãm na, quê ha ihkàhhôc ita cahyt, ne ampo par jahkre pej tomõ, ne ramã hàpên xà impejti cunea caxuw amji mã hàncuprõn to mõ.

4

Timot te mehcunea mã Pahpãm jarkwa jarên xà

Coroxo 4.5-6

¹ Ýhÿ Timot, wa ha gapackre ne Pahpãm me, Jeju Crixto kam mare mã amã ijarkwa ta. Pom Jeju te mehcukij ne me ajpên pê me to ipicokjêr xà jõ amcro kam, quê ha amji na mehtyc to cuprõ, ne mehtÿr to cuprõ, ne cute ahpÿanre na, cute ame amji kam hapac xà ton atajê kôt, mehcukijxà caxuw. Mã Jeju te ahna me hahkre

pej atajê na, quê hamehcukij. Ne cute mehcukij jirô pê, quê ha amji to pjê cunea jô Pahhiti.

² Cwÿrjapê wa ha amã ijarkwa ta, ca ha mehcunea mã Pahpãm jarkwa to acakôc to apa kam apec xà nare kam, kam xuwcaca nare kam, me cumã to acakôc toapa. Ne hanea ne apec xà kam, xuwcaca kam, me cumã Pahpãm jarkwa to acakôc to apa. Negÿjarên xà ita na me cumã awjahkrea ne, ne ma mehkên tête mehcahpêrkàr to apa. Ne me cumã ampo itajê to hahkre na, amji mã me to gàhtàtti toapa, ne ma ajpên kam me hakryti na me cumã gÿjahkre to apa.

³ Nãmri quê ha cormã me hÿmre jÿpar nare atajê jô amcro kam ahtwÿ, quê ha nee me gÿjarên pejtipê ampeaj kam atajê kam me hapac nare. Neamjia kôt cute amji mã me amji kam hapac xà kÿnti atajê kôt, quê ha ame ipa. Ne amji mã, cute me ampo to hahkre catêjê jàhtôa ne me to cuprô. Ne me cumã:

— Ite amji mã me ampo parna prãmti atajê to, ca ha me imã hahkre — hane.

⁴ Ne pom me hÿmre itajê, quê ha me Pahpãm jarkwa pejti kam me hapac jicu, ne ajte men-quêtjê jÿjarên hêj xi xà kam, quê ha quêt me hapac to me ipa.

⁵ Ne ca Timot, ca ha itajê cunea pê amji to guphê to apa, ne ma ahna amji jamãr peaj ne. Ne ate amji pupun xà kên itajê mã awcanãa ne, ne cama amji to apê Pahpãm wÿr me to ipipkjêr catê na, amji toimpeaj ne. Pom apê Pahpãm mã me gápên catêjê nã ita? Na ca ha cumã gápên xà itajê cunea to impeaj to apa.

⁶ Pê wa mam Pahpãm mã ramã amji gã, ne cumã amji to awjahkre, ite cumã ijàpên itaa kam ityc xà jô amcro mã hahêr, na pê wa cumã amji toawjahkre. Ne ramã ipê pjêkrân to mō, ite amji to ijũjahkre xà ata wÿr.

⁷ He wa ramã ite ampo kên itajê cunea me amji cujtên to kênre nare. Ne hanea ne ijàhcukren kênre nare, ne wa hanea ne ite amji mã iteJeju to amji mã ihmpej xà ita juwahi to kênre nare.

⁸ Ne pom ijàpên xà itajê jahpan xà na, ramã Pahpãm cahê na imã ijàmchwÿr xà impejti ata nō. Ne mehckij ne me to ipicokjêr xà jô amcro kam, quê ha Pahhitipê krã kreti te catyt kam me pahckij catê ata, quê ha imã ijàmchwÿr xà ita gã. Ne ijàmchwÿr xà ita pê ihhêj rûm pjê kam pahhi krãhkà. Quê ha Pahpãm ikrã na ihkrãhkà ata pupu ne imã:

— Ate amji kam gapac xà cunea na apeaj to apej — hane. Hōhō, quê ha Pahpãm ito hane, ne nee wa ha ahte hajÿr nare, ne por Jeju jikaj kam, mecumã amji kïan kam mehikaj to ipa atajê, quê ha me hanea ne icuxà ame amcwa.

Pê Pawrô Timot mã amji jarê

⁹ Na ca ha atÿj ajpên iwÿr atêm pyrentu ne ipupu, nãmri wa ahte ikrĩ.

¹⁰ Pê Tema amji mã pjê ita te amji kam hapac xà kïn, ne incryc imã hikra ne ma tē, Texarôn jô krĩ wÿr. Mã Crexên ma Carati jô pjê wÿr hàpên xà wÿr tē, ne hanea ne Tito ma Tarmati jô pjê wÿr hàpên xà wÿr tē.

¹¹⁻¹² Ne pê wa ma Epet jô krĩ wÿr Tiquicô kujate. Mã Ruc pyxit peaj ne icahê na ihkrĩ. Ca

ha tẽ ne Macô japrô ne ajpên to tẽ, nãmri taa mãquê ha ihtỳj ijâpên xà ita na itehcajpa.

¹³ Ne ajpên me amôr xà wỳr, ajpên me imã ite Trôwat jô krĩ kam, Carpojũrkwa kam, ikàhti juwahi ata pỳ, ne hanea ne ajpên imã ihkàhhôc kwỳ jàhhuc atajê incwa, ne nee ca ha, por wa cormã kam ihhôc to prãm ata to me gapac kêt nare.

¹⁴⁻¹⁵ Ne ma amji na me wakỳti to hàpên catê japyr te Arexãnre ata to me guphêa ne. Nãmri pahte amji kam me pajapac xà ita na, ampeaj kam cama me pahkam hàprê, na pê ramã ito kên crire nare. Ne imã cute ito kên jahpan xà na, Pahpãm te cumã hàmjôr na to prãm.

¹⁶ Ne pê Roman catêjê jô pahhiti icukij prãmte, amji cuna mã ixãm, pê wa ahte me cuna mã xa, ite amji na ijaprâr prãmte. Pê ajte me pahkwỳ itajê cunea me ire, ne ma ipê amehcahkũm. Ne pom cute me itohajỳr xà ita na, quê nee ijahpan xà na jũ caxuw Pahpãmjũ mã me ton nare.

¹⁷ Pê Pahpãm icahê na xa, ne ma imã carôt gô, pê wa carôat kôt mehcahkrit atajê mã Jeju jarên pejti itajê cunea jarên toxa, ne pea ite amji to ityc xà jahpan.

¹⁸ Ne quêt me Pahpãm pê Pahhiti te hajỳr romã mã, quê ha ampo itajê cunea pê ipytà, ne ma còjkwa wỳr ijaprô, wa ha curia ihhimpej xà atakrac ri ikrĩ. Ýhỹ, cu ha hõtpê Pahpãm mã me pajũjarên to hajỳr to me papa he:

— Hirã pê, mehcunea jirôa pê acati — hane. Quê ha mehcunea me pahkampa, ne me harkwa to:

— Ampeaj kam! — hane.

Pê Pawrô me, mehkwy Timot mã me amji jarẽ

¹⁹ Ne Prixirakwỳj mã ijarẽ, Aquira mea mã, ne hanea ne Onetipo me, mehkramea mã, me cumã ijarẽ.

²⁰ Ne Eraxô mat ri Corinti jô krĩ kam hàhhuc, ne ite amji jakàn pê Tropimo juwahi, Krîtêpti kam, pê hà incwỳrjapê pê wa huwahi.

²¹ Ajpên me amji jahkre, ne pahhàjê pỳm xwỳjrea na iwỳr me acator to me hahkre. Ne hanea ne me pahkjêjê kwỳ itajê te ri me amã amji jarënkujahêc he: Ewpuro me, Prutën me, Rino me, Cawtikwỳj me, mehkwy cahhur itajê cunea te me amã amji jarën kujahêc.

²² Na wa ijôtpê ite Pahpãm mã me acajrën to hajỹr he:

— Me ijô Inxũ, ca ha Timot mã acarôt gô, quê nee apu acarôt ita kam amji na ampo cãmji nare. Ne Timot na mehkwy cunea to impeaj ne — hajỹr. Hamre.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a